

**PERATURAN UNIVERSITI TUN HUSSEIN ONN MALAYSIA
(ETIKA BERPAKAIAN DAN SAHSIAH
RUPADIRI PELAJAR)**

PADA menjalankan kuasa yang diberikan oleh subseksyen 26(1) Kaedah-Kaedah Universiti Tun Hussein Onn Malaysia [*P.U.(A) 234/2009*], Naib Canselor membuat Peraturan berikut:

Nama

1. Peraturan ini bolehlah dinamakan **Peraturan Universiti Tun Hussein Onn Malaysia (Etika Berpakaian Dan Sahsiah Rupadiri Pelajar) 2013.**

Peraturan Am

2. Mana-mana pelajar hendaklah –
 - (a) berpakaian kemas, bersih, sopan, tidak ketat, tidak jarang, tidak menjolok mata dan berpakaian sesuai dengan amalan masyarakat Malaysia;
 - (b) mempamerkan dengan jelas Kad Matrik Pelajar semasa berada di dalam kawasan kampus kecuali semasa menghadiri atau menjalani aktiviti sukan;
 - (c) tidak memakai pakaian atau aksesori yang melambangkan mana-mana pertubuhan luar atau kumpulan tertentu kecuali dalam keadaan tertentu dengan kebenaran Naib Canselor. Pakaian pelajar mestilah tidak melambangkan mana-mana simbol atau tulisan yang berbentuk provokatif atau menunjukkan sebarang sokongan, bantahan atau simpati kepada mana-mana parti politik, berimej lucah dan melanggar peraturan yang ditetapkan Universiti;
 - (d) pakaian tradisional boleh dipakai dengan syarat ia tidak melanggar peraturan Universiti;
 - (e) pelajar lelaki tidak boleh menyerupai perempuan dan pelajar perempuan tidak boleh menyerupai lelaki; dan
 - (f) pelajar juga tertakluk kepada etika berpakaian khusus yang ditetapkan oleh Fakulti dan Pusat Pengajian yang berkaitan.

Peraturan berpakaian semasa menghadiri majlis rasmi atau urusan rasmi Universiti

3. Semasa menghadiri majlis rasmi atau urusan rasmi Universiti –

- (a) pelajar dikehendaki berpakaian kemas dan sopan mengikut etika pakaian yang ditetapkan oleh penganjur dan tidak melanggar peraturan Universiti; dan
- (b) pemakaian jeans adalah tidak dibenarkan semasa menghadiri majlis rasmi atau urusan rasmi Universiti.

Peraturan berpakaian semasa menghadiri kuliah

- 4. Semasa menghadiri kuliah -
 - (a) pelajar dikehendaki berpakaian kemas, sopan dan tidak melanggar peraturan Universiti; dan
 - (b) pemakaian jeans adalah dibenarkan semasa menghadiri kuliah dengan syarat ia tidak ketat, londeh, lusuh, koyak-koyak dan bertampal-tampal.

Peraturan berpakaian semasa menghadiri makmal, aktiviti sukan, aktiviti kebudayaan atau aktiviti pelajar

- 5. Semasa menghadiri makmal, aktiviti sukan, aktiviti kebudayaan atau aktiviti pelajar –
 - (a) pelajar hendaklah mematuhi etika pakaian dan peraturan yang ditetapkan dalam aktiviti tersebut;
 - (b) seluar pendek dan baju tanpa lengan hanya dibenarkan dipakai semasa melakukan aktiviti sukan dan sekitar gelanggang sukan sahaja; dan
 - (c) pakaian renang hanya dibenarkan dipakai semasa melakukan aktiviti renang dan ketika berada di dalam kawasan kolam renang sahaja.

Peraturan berpakaian khusus untuk pelajar lelaki dan perempuan

- 6. (1) Seorang pelajar lelaki -
 - (a) dilarang memakai *t-shirt* tanpa kolar dan baju tanpa lengan semasa urusan rasmi;
 - (b) digalakkan memakai pakaian ko-kurikulum atau beruniform atau korporat pada setiap hari Rabu. Pelajar yang terlibat dengan aktiviti ko-kurikulum dan aktiviti badan beruniform adalah tertakluk kepada arahan yang ditetapkan oleh persatuan berkenaan;
 - (c) digalakkan memakai baju kebangsaan pada setiap hari Jumaat bagi pelajar lelaki muslim. Bagi pelajar yang terlibat dengan aktiviti makmal, etika berpakaian adalah tertakluk kepada peraturan yang ditetapkan oleh makmal berkenaan;

- (d) hendaklah memakai kasut yang bertutup dan berstoking. Selipar dan sandal dilarang sama sekali semasa menghadiri kuliah, ujian, peperiksaan akhir, perpustakaan dan ketika berurusan rasmi di Universiti;
 - (e) dilarang membuat atau mempamerkan *tattoo* di mana-mana bahagian anggota badan;
 - (f) dilarang berambut panjang (mencecah kolar baju, menutup telinga dan mencecah kening), berekor, berwarna dan berfesyen rambut yang tidak kemas;
 - (g) dilarang sama sekali memakai gelang, rantai, anting-anting atau apa-apa aksesori perhiasan diri kecuali untuk tujuan keagamaan; dan
 - (h) sekiranya berjambang atau berjanggut hendaklah memastikan jambang dan janggut tersebut sentiasa dijaga dengan kemas dan rapi.
- (2) Seorang pelajar perempuan -
- (a) digalakkan memakai baju kurung pada setiap hari. Bagi pelajar yang terlibat dengan aktiviti makmal, etika berpakaian adalah tertakluk kepada peraturan yang ditetapkan oleh makmal berkenaan;
 - (b) digalakkan memakai pakaian ko-kurikulum atau beruniform atau korporat pada setiap hari Rabu. Pelajar yang terlibat dengan aktiviti ko-kurikulum dan aktiviti badan beruniform adalah tertakluk kepada arahan yang ditetapkan oleh persatuan berkenaan;
 - (c) hendaklah memakai pakaian yang bersesuaian dengan aktiviti yang dijalankan dan memastikan pakaian yang dipakai tersebut adalah sopan, kemas, tidak ketat, tidak jarang dan tidak menjolok mata serta mendedahkan sebahagian dari tubuh, bahagian dada atau bahagian belakang;
 - (d) sekiranya memakai kain atau skirt hendaklah pastikan kain atau skirt tersebut melepasi buku lali. Pemakaian skirt mini, atau skirt yang berbelah dan ketat adalah dilarang sama sekali;
 - (e) dilarang memakai seluar yang ketat, londeh, singkat dan hendaklah panjang sehingga melepasi buku lali;
 - (f) dilarang memakai pakaian yang menutup muka;
 - (g) dilarang mewarnakan rambut;
 - (h) dilarang menindik lebih dari satu tindikan di telinga;
 - (i) dilarang mewarna kuku; dan

- (j) hendaklah memakai kasut yang bertutup. Selipar dan sandal dilarang sama sekali semasa menghadiri kuliah, ujian, peperiksaan akhir, perpustakaan dan berurusan rasmi di Universiti.

Penguatkuasaan

- 7. Semua staf Universiti adalah pihak penguatkuasa kepada peraturan ini dan boleh membuat teguran secara terus kepada mana-mana pelajar atau melaksanakan tindakan sebagaimana yang diperuntukkan di peraturan 8(1) dan (2).

Tindakan terhadap pelajar yang melakukan pelanggaran peraturan

- 8. (1) Mana-mana pelajar yang tidak mematuhi peraturan ini boleh dihalang daripada memasuki atau berurusan di kelas atau makmal atau pejabat yang berkenaan.
- (2) Pelajar juga boleh dikenakan denda RM 5.00 dengan memberi notis dendaan untuk setiap kesalahan.
- (3) setiap kesalahan yang dilakukan di bawah peraturan ini akan direkodkan dalam fail peribadi di Sistem Maklumat Pelajar.

Pengecualian

- 9. Tatacara berpakaian selain daripada yang dinyatakan di dalam peraturan ini hendaklah mendapat kebenaran khas daripada Naib Canselor.